

nea

gondia

1840

1840



K-VI-6

6 7
ARCTOS
SARMATICA.

2^{VA}

GENEROSÆ IVVENTVTI
ACADEMICÆ
PRIMAM

In artibus liberalibus & Philosophia
LAUREAM

IN AVLA DIVI IAGELONIS
Anno Domini, 1638. Mens. Mart.
Die Hora


CAPESENTI,

AB

ALBERTO SAMBORSKI,

eiusdem laureæ Candidato

MONSTRATVR.



CRACOVIAE, In Officina Stanislai
Bertutovic.

IN STEMMA ALMÆ ACADEMIÆ
CRACOVIENSIS.



Quem Sceptis Lechi regniq; Curulibus altis
Fadifragum, dederant Gallica regna, virum.
Henricus dicebat Rex, DVO PROTEGIT VNVS,
Lemmata periuri ô male falsa Viri!
Hæc tua laus M A T E R, tibi dum duo Sceptra videmus
Scribimus, æternum quod tegis vna duo,
Assen innumeris donas tua præmia Natis,
Innumeros igitur PROTEGIS VNAParens.

Albertus Bariczka Stud. Pœf.

ARCTOS POLONA.

Eheu, marinæ quanta proteruix
 Ditis furenti turbine concita
 Procella sæuit ! quot Charybdes,
 Quot rabidæ patuere Scyllæ
 Per alta mundi climata ! pestilens
 Rursumné fluctu concutit æquora
 Corus, dehiscens & rapaces
 Oceanus glomerat furores
 Rursum fidelis gurgite Carpathi
 Proteus locatus ; flumine præpeti
 Natante damâ coget altis
 Culminibus residere Phocas
 En nubilosis turbida vultibus
 Se multiformi nox animat lue,
 Rapidq; lucem tramitesq;
 Quà iuuenum generosa turba
 Excelsiores sydereæ petat
 Virtutis ædes ; nube volantium
 Tegit voluptatum, Stygisq;
 Lucifugæ tenebris obarmat.
 Ergo' procaci robore fortior
 Vastabit electæ indolis incitos
 Ausus nec illam sub cauernis
 Cimmerijs generata nubes,

Serenioris lumina Cynthij
Adire mittet: siccinē nubilus
In mentibus regnabit error,
Nec Sophiæ celebres triumphos
Orbis videbit: non sapientia
Victrix coruscis vecta curulibus,
Tenella cælesti iuuentæ
Corda piæ, recreabit ore:
Vos Candidati vos melioribus
Prognata fatis progenit dies
Quibus beatâ luce diues,
Splendet iter bene luminatum.
Millena non si fulmina detonent
Non si furentes Æoliæ minæ
Crepent, eâ fulgente stella
Instabilem metuetis orbem.
Planeta si quis lumina deneget
Vobis, sed omni sydere pulchrior
Lucem dat ARCTOS quæ est Polono
Fixa polo meliore fato.
Quid? an recuruos non bene dirigit
Flexus viarum hæc stella: laboribus
Supponitis cum terga duris.
Illecebras fugitis inanes.

Vos

Vos lumen auri, vos iuga lubricæ,
Spreuistis aulæ, quæ modo prospero

Etesiarum tuta flatu

Æquora cæpta spei pererrat,
Rursum fugaci si placuit Dææ,
Bene ominatas turbine diruit

Spes atq; curas: sic negata

Offa coquit vigiles Molossos.

At quàm Camænis iuncta sodalibus,
Germana recti candida veritas,

Et quæ nitescit non dolosis

Luminibus sine labe virtus

Vestras pudicis vrit amoribus

Fibras, & almis ignibus afficit

Ad laureatas atq; Pompas

Præcipiti iubet ire Cliuo.

Vos arctiori pectora vinculo

Magnæ alligatis Matri Academiæ

Non erubescendam fidemq;

Connubio stabili dicatis.

Nec pœnitebit: scilicet hac diu

Fulgebit ardens, vester honos domo

Ad vsq; solis fulgurantis

Inuidiam, niueaq; Phæbes.

Hic

Hic doctioris laurea verticis
Vestro nitescens lumine, laureas
Vincet Virorum, quos coërcet
Sequana non tacito fluento.
Immo & vetusti dogmata seculi,
Labore vestro orbis reuirefcere
Gaudebit, olim & restitutam
Hellada Sarmatiæ putabit.
Orator Urbis prodeat Atticæ
Obluionis nescius infimæ,
Mirabitur vos, qui Pelasgum
Terruit eloquio Dynastam.
Et suauiori qui cecinit sonò,
Nutritus ipso lacte scientiæ,
Platoq; miraretur amplis
Muneribus celebris Thaliæ.
Si de Quirinis clarior urbibus,
Prægrande Suadæ Romuleæ decus,
Et melleæ flumen loquelæ
Surgat humo repetatq; rostra;
Cunctos inassuetus rapiet stupor,
Arcana causarum penetralia
Dum vos recludetis, periti
Eloquij, dubiosq; sensus.

Tunc

Tunc fama, claro nominis effedo,
Laboriosi vos iubar agminis
Seu quà colonis Phæbus ardens
Dissimiles tribuit colores.
Seu quà beati Climatis incola
Candore claras exsuperat niues
Portabit, exemplum & nepoti
In studijs dabit exprimendum.
Insculpta vestrûm deniq; nomina
Virtus reponet, sydere nec suo
Terros sub vngui linquet escam.
Dente necis rabido vorandam,



Andrææ

ANDRÆ WOLPHOWICZ.

S Armatiam quæcunq; ratis sulcauit aquosam,
Arctos non vnquam viderat illa duas.
Scilicet Europæ lucem Cynosura ministrat :
Ast Helicem oppositam Graia carina notat.
Soli bina tibi WOLPHOWICZ splendicat Arctos,
Ad freta Musarum dum tua vela paras.
Præceptis tibi namq; vias Academia Mater
Monstrat, maioris nomine digna poli.
Et natum PATER exemplis informat honestis,
Dicier & sydus sed minus inde potest.
Vna illi micuit : Cursum tamen ille peregit
Rectè : quid facies sit tibi bina nitet?

GEORGIO PIECHOWICZ ZAMOSC.

Hospes Rosiacis vt venit Phæbus ab oris,
Lustrauitq; Virûm mænia Craciadum.
Te quoq; PIECHOWICZ nostræ prenfare Parentis
Lauros conspicuas, vidit, & erubuit.
Atq; ait, ergo tuo capiti Zamoscia Musa
Non vllas lauros repperijse potest?
Olli Craciadum doctissima Clio reponit
Cur non Piechowic Laurea nostra datur?
Lauros de Cracijs Musæ carpsere Zamoscæ,
Cur non de Cracijs huic quoq; Laurus eat?

Rossa

Rossa hinc Musabibit Sophiam; cur non bibat ille?
Dulcius ex ipso fonte bibuntur aquæ.

STANISLAO IARZYNA.

Perge tuis magnum factis implere IACOBVM
Cælica quem Patrum fata dedere tibi.

Ille etiam Campo quondam sudauit in isto,
Nunc aliter Campo sudat at ille Nouo.

Te tamen emensâ postquam decessit arenâ,
Deposcit proprias rite subire vices.

Non nego, celsa suæ est virtutis scala; quid inde?
Iacobi in sacris celsior illa fuit.

Quàm multi tamen illius tenuère suprema?
Infima sed graduum qui tenuere prius.

Sic tu dum Patruï magnos sectaris honores,
Vt suprema habeas infima prede prius.

ALBERTO ORLOWSKI.

Musæ delictum, iubarq; Phæbi,
Cui dat nobile fulminis Minister
Nomen: omnibus altior Pygargis,
Non pigri vegeto ingenij volatu
Surge, & doctiloquam reuise Cirrham.

En Mater nitidi ferax honesti
Artis lumina dat tibi tuenda.

Surge & indolis excita venustæ
Nixus, ô iuuenis beatiores.

B

Prompto

Prompto & lumine lumen intueri.
Tunc Vrbes, populos pigros relinquens,
Famæ tergo confidens, volabis
Inter sydera splendentis orbis,
Nomen atq; aquilæ tenebis aptum.

PAVLO SCROBOCKI.

CAstaliæ nauem Craciæ concedis anhelam
Laudo sagacem spiritum
Palladios & aues Nautas comitarier : istam
Exosculor prudentiam.
Non alio mihi crede loco Rhamnufidis aura,
Sese explicat fauentius.
Petrus dicturus leges, à piscibus, orbi,
Christo vocante prodijt.

ANDREÆ NICIO.

TE quando comitem plebeia turba colebat,
Ignotus fueras pænè & inane nihil.
At nunc dum sophiæ fidus vis esse sodalis,
Incipis esse aliquid, desinis esse nihil.
Imò homo. solus homo sapiens benè quippe vocatur,
Dicitur at merito vulgus inane nihil.
Ergo Romanum, ô Nici fauste, Parenti,
Hic sunt homines, nobile lemma dato.

MAT.

MATTHIÆ IVRKOWIC.

TOtus dum recipit virentiores
Orbis, sole nouo nitente vultus,
Flore terraq; se tegit recenti.
Tollis tu quoq; promptus altiores
Vultus; atque nouum æmularis orbem,
Namq; vertice laurus cuirefcit.
Ifelix, bone, tam diu virescas
Mundi machina quam diu virescet.

ANDREÆ TLVSTOWSKI.

Agricolis pinguis confueuit gleba placere:
Nam nouit dominos exhilarare fuos.
A Mufis genius verum non pinguis amatur,
Nefcit enim Dominas exhilarare fuas.
Tu, fi pinguis inefl genius, macerare memento,
Non adit Aoniam pinguis Aqualiculus.
In tectis etenim Phæbæ & limine turbæ,
Continet exiguas ianua ftricta fores.

ANDREÆ STEPHANSKI.

ET quâ pifcofas Tyberis protrudit arenas,
Et quâ deproperat Bætis ad Oceanum,

Et quàm Neptuno celeri dat fonte tributa
Rhenus, vidisti, quaq; Garumna fluit.
At tamen en, natale solum quandoq; recepit
Te, lauri memorem fecit & esse sui.
Patria terra etenim, si terrà dulcior omni est;
Dulcior ex omni Patria laurus erit.

ANDRZEJ ROLSKI.

ECquid id est? patrium sumis cognomen, ab agro?
Pande quis iste tui nominis auctor ager?
Namq; alijs lolium, & steriles dominantur avenæ,
Ast alijs messis culta virescit agris.
Crede igitur, culto si nomen ducis ab agro;
Fiet ab Aonio cultior ille solo.
Sin sterili, doctum cultorem quiq; requirat,
Est cultrix agri Musa perita Craci.

BARTHOŁOMÆO MACHONIEWICZ.

EST inimica altis fors. Viribus Herculis Antæus
Disperijt; Siculis Enceladusq; iugis.
Gerion Antæo similis, Briareus ad Orci
Limina stat, fulmen pertimuitq; Mimas.
At tua, dum doctâ cinguntur, tempora, lauro,
Largius an poterunt fata favere tibi?
Accelera, sed adhuc plenis velisq; labora,
Magna ut sint pariter, corpus, & ingenium.

Ioanni

IOANNI GÖRELSKI VSTIEN.

O Minē felici in lucem procedis apertam,
Eq; manu Matris laurea ferta capis.
O fortunatam Patriam, quæ fulgida tantos
Ad Craciæ lauros, scit generare viros.
Sed magè laudandam, toties quæ donat honores
Laurigeros, Clarium suppeditatq; iubar.
Nō mirū. Nam M A T E R ea est mare : nūquid ab isto
Gurgite, gemma Lechis non numerosa fluit ?

SIMONI KOTECKI.

I N pelagus Clariâ, Phæbi quod, puppe secatur,
Ingenij ducis vela ratemq; tui.
Tuta via est, procede, bonis atq; vtere fatis,
Fortunentq; tuas astra benigna vias.
Nullū hic naufragium metuendū, nulla Charybdis.
Vnda tamen solos obruit ista pigros.
Orarus gurges Phæbei fluminis ! in quo
Pigrities mors est, at labor vna salus.

IOANNI CHOLEWSKI.

Q VÆ nouies Manes Orci interfusa coercet
Integra, sulfureo Nais odore scatet.
Porro, quas Lechis felix excusserat olim
Vngula, Sarmatici Bellerophontis, aquas.
Non

Non illas tetrâ populatur forde Mephitis,
Est etenim doctæ melleus amnis aquæ.
Sed cur? (sollicitâ toties tu, mentis reuolue.)
Hæ vitium capiunt ni moueantur aquæ.

ALBERTO WALKOWIC VSTIEN.

Castaliæ latîces puros tua naus oberrat,
Puram igitur nauem conuenit esse tuam.
Si fortuna tuo vanos sub corde fauores
Spirat, & emollit pectora blanditijs;
Filia si Ditis residet sub mente voluptas,
Ocyus eripe te, subtrahe teq; neci.
Eijcit illecebris solers hæc vnda fluentes:
Inuisum æquoreis quippe cadauer aquis.

PAVLO PRZYTŹLOWIC VSTIEN.

Nunc perfecta nitet, nunc dimidiata refulget
Cynthia, nunc noctes falcis ad instar obit.
Instabilis non luna fuit, seu si fuit vnquam,
Constans promebat Patria vestra iubar.
Semper enim genuit generosâ mente iuuentam,
Quæ genij pariter lumine clara fuit.
Perge igitur. Nam turpe futurû est, Cynthia per te
Si quæ plena fuit, dimidiata fiet.

Ad

Ad Admo: Reuer. & Excellen. Dnum
M. PAVLVM HERCIVM
MATHESEOS ORDINARIVM
PROFESSOREM, & ARTISTICÆ
FACVLTATIS DECANVM LONGE
dignissimum


O D E.


NEc te ô Columen grāde Matheſeos;
Qui quæſita ſenis clauſa Syracuſi
Docta mente pererras,
Noſtrum prætereat metrum.
Te miti Tyberis vortice deſluens,
Oris Sarmaticis vidit vt hoſpitem,
Mirabatur & ampli
Gurges ſubſiliit vadi.
Tu, quam perpetuo noctiuagæ faces
Portant dona ſui tramite luminis,
Firmo cernere noſti
Magni lumine pectoris.
Tu, cur Viſa nitens, vna nitoribus
Claris nos recreat, torpet at altera
Nec dignatur amanos
Vultus tollere celſius;

Scis

Scis cur flauicomis Cynthia cornibus
Nunc dissecta iubar dimidium iacit,
Post hac pulchra colorat
Pleno corpore climata;
Et cur candiduli lumen Apollinis
Nunc nostras propius vergit ad orbitas,
Rursum luce remota
Frigus non superat ferum.
O felix igitur vos comitum cohors
Isto si properas calle fidelior
Quo hic tendebat Achilles,
Phæbi prendere laureas.
Sed nec fors renitet deterior tibi
Cui perfecta Decas nomina texuit
HERCI, gloria nostræ
Lauri, splendor & ordinis.
Quisquis namq; tuis auspicijs petit
Poni dona, suo vertice, laurea.
Te per metra vocabit
MATRIS sydus amabile.
Et non paruus ego carminis ardui
Viuam, quo tua dem nomina gloriæ,
Atq; vnum geminabo
LONGIS VIVITO SECVLIS.







A. 3



818864 Bibliotheca 28 000,-
P.P. Camaldulensium in Bielany

Depozyt w Bibliotece Jagiellońskiej



03947

K.VI.6

